

四庫全書

集部

欽定四庫全書

御定佩文齋詠物詩選卷二百四十三

酒類

五言古

子夜歌

晉樂府

舉酒待相勸酒還杯亦空願因微觴會心感色亦同

前有一罇酒行

晉傅玄

置酒結此會主人起行觴玉罇兩楹間絲理東西廂舞

袖一何妙變化窮萬方賓主齊德量欣欣樂未央同享  
千年壽朋來會此堂

飲酒

晉陶潛

故人賞我趣挈壺相與至班荆坐松下數斟已復醉父  
老雜亂言觴酌失行次不覺知有我安知物為貴悠悠  
迷所畱酒中有深味

其二

子雲性嗜酒家貧無由得時賴好事人載醪祛所惑觴

來為之盡是謔無不塞有時不肯言豈不在伐國仁者  
用其心何嘗失顯默

對酒

梁張率

對酒誠可樂此酒復芳醇如華良可貴似乳更堪珍何  
當畱上客為寄掌中人金樽清復滿玉椀亟來親誰能  
共遲暮對酒惜芳辰君歌尚未罷却坐避梁塵

對酒

陳張正見

當歌對玉酒匡坐酌金罍竹葉三清汎蒲萄百味開風

移蘭氣入月逐桂香來獨有劉將阮忘情寄羽杯

對酒

陳岑之敬

色映臨池竹香浮滿砌蘭舒文汎玉盃漾蟻溢金盤簫  
曲隨鸞易笳聲出塞難惟有將軍酒川上可除寒

蒙賜酒

北周庾信

金膏下帝臺玉瀝在蓬萊仙人一遇飲分得兩三杯忽  
聞桑葉落正值菊花開阮籍披衣進王戎含笑來從今  
覓仙藥不假向瑤臺

答王司空餉酒

庾信

今日小園中  
桃花數樹紅  
開君一壺酒  
細酌對春風  
未能扶畢卓  
猶足舞王戎  
仙人一捧露  
判不及杯中

蒲州刺史中山公許乞酒一車未送

庾信

細柳望蒲臺  
長河始一迴  
秋桑幾過落  
春蟻未曾開  
瑩角非難馭  
槌輪稍可催  
只言千日飲  
舊逐中山來

月下獨酌

唐李白

自序  
卷二百四十三  
天若不愛酒酒星不在天地若不愛酒地應無酒泉天  
地既愛酒愛酒不愧天已聞清比聖復道濁如賢賢聖  
既已飲何必求神仙三杯通大道一斗合自然但得醉  
中趣勿為醒者傳

岐亭

宋  
蘇軾

昨日雲陰重東風融雪汁遠林草木暗近舍煙火濕下  
有隱君子嘯歌方自得知我犯寒來呼酒意頗急撫掌  
動鄰里遶邛捉鷺鴨房櫳鏘器聲蔬果照巾幕久聞萋

蒿美初見新芽赤洗盞酌鷺黃磨刀削熊白須臾我竟  
醉坐睡落中憤醒時夜向闌唧唧銅瓶泣黃州豈云遠  
但恐朋友缺我當安所主君亦無此客朝來靜菴中惟  
見峯巒集

洞庭春色

蘇軾

二年洞庭秋香霧長嘆手今年洞庭春玉色疑非酒賢  
王文字飲醉筆龍蛇走既醉念君醒遠餉為我壽餅開  
香浮座盞凸光照牖方傾安仁醺莫遣公遠鷄要當立



名字未用問升斗應呼釣詩鈎亦號掃愁帚君知蒲桃  
惡正是嫫母黝須君盪海杯澆我談天口

和陶淵明飲酒

蘇軾

頃者大雪年海波翻玉英有士常痛飲饑寒見真情牀  
頭有敗榼孤坐時一傾未能平體粟且復澆腸鳴脫衣  
裹凍酒每醉念此生

其二

民勞吏無德歲美天有道暑雨避麥秋溫風送蠶老三

燕初有聞一溉未濡稿詔書寬積欠父老顏色好再拜  
賀吾君獲此不貪寶頽然笑阮籍醉几書謝表

其三

淮海雖故楚無復輕揚風齋廚聖賢雜無事時一中誰  
言大道遠正賴三杯通使君不夕坐衙門散刀弓

有客

宋  
張九成

春雨止復作閉門無與居童奴告予言有客叩吾廬束  
帶出見之頎然一丈夫手攜一樽酒辭氣何晏如謂言

久聞名曾未瞻簪裾天寒宜飲酒一杯聊以娛盤飧亦  
草草蔬果間谿魚顏色溫勝玉言談貫如珠豈期有道  
者而來警我愚酒酣意兩適心間樂有餘四海元有人  
君勿輕荒區

寒食對酒

宋  
楊萬里

荔枝園園花寒食日日雨先生老多病頗已疎綠醅兒  
童喜時節笑語治樽俎南烹既前陳北果亦草具蝸蚶  
方纔甘笋蕨未作苦先生欲獨醒兒女難多拒初心且

一杯三杯亦漫許醒時本強飲醉後忽快舉一杯至三  
杯一二三四五偶然問兒輩卒爵是何處兒言翁但醉  
已忘酒巡數

舟中新暑止酒

楊萬里

新暑酒不宜作熱妨夜睡不如看人飲亦有醉意彼  
飲吾為燕所美過於味同舟笑吾癡吾不羨渠醉安知  
醉與醒誰似誰不似

飲酒

金元好問

西郊一畝宅閉門秋草深牀頭有新釀意愜成孤斟舉  
杯謝明月蓬華肯相臨願將萬古色照我萬古心

歡飲

元 劉 因

同類天地中相親理所宜前後億萬年而我生此時前  
予既不及後孰能待之同時四海內徧識將無期所識  
既無幾賞心又當誰政有賞心人會遇亦復希當其會  
遇時豈無事相違今朝好風色不飲君何辭

對酒

元 倪 瓚

題詩石壁上把酒長松間  
遠水白雲度晴天孤鶴還虛  
亭映苔竹聊此息躋攀坐久日已夕  
春鳥聲闌闌

和陶飲酒

明 陳憲章

木犀冷於菊更後十日開  
清風吹芳香芳香襲人懷千  
回嚙入腹五內無一乖雖靡鸞鳳吟  
亦有鷓鴣棲昔者東籬飲百榼  
醉如泥那知此日花復與此酒諧  
一曲盡一杯酌酌花間迷赤脚步  
明月酒盡吾當回

凍醴

明 王 鏞

傾家五斗米衝缸三斗水一夜北風霜長稜生榨背君  
勿嫌其薄洗袋副未已猶足勝沽來推恩到奴婢一笑  
呵凍硯援筆賦凍醴

六言古

飲酒樂

晉  
陸機

蒲萄四時芳醇瑠璃千鐘舊賓夜飲舞遲銷燭朝醒絃  
促催人春風秋月恒好驩醉日月言新

七言古 附長短句

金陵酒肆留別

唐李白

白門柳花滿店香  
吳姬壓酒喚客嘗  
金陵子弟來相送  
欲行不行各盡觴  
請君問取東流水  
別意與之誰短長

新豐主人

唐儲光義

新豐主人新酒熟  
舊客還歸舊堂宿  
滿酌香含北砌花  
盈尊色泛南軒竹  
雲散天高秋月明  
東家少女解秦箏  
醉來忘却巴陵道  
夢中疑是洛陽城

湖上對酒行

唐張謂



夜坐不厭湖上月  
晝行不厭湖上山  
眼前一樽又長滿  
心中萬事如等閒  
主人有黍百餘石  
濁醪數斗應不惜  
即今相對不盡歡  
別後相思復何益  
茱萸灣頭歸路賒  
願君且宿黃公家  
風光若此人不醉  
參差負東園花

李審言遺酒

宋梅堯臣

大梁美酒斗千錢  
欲飲常被饑官煎  
經時一滴不入口  
漱齒費盡華池泉  
昨日靈昌兵吏至  
跪壺曾不候報箋  
赤泥圻封傾瓦盎  
母妻共嘗婢流涎  
鄰家葡萄未結子

引蔓垂過高牆巔當街賣杏已黃熟獨堆百顆充盤筵  
老年牙疎不喜肉况乃下箸無腥膾空腸易醉忽醪酏  
倒頭夢到上帝前賜臣蒼龍跨入月不意正值姮娥眠  
無人來顧傍玉兔便取作腊下九天拔毛為筆筆如椽  
狂吟一掃一百篇其間長句寄東郡東郡太守終始賢  
切莫汲竭滑公井畱釀此醕待我傳

真一酒歌

宋蘇軾

空中細莖插天芒不生沮澤生陵岡涉閱四氣更六陽

森然不受螟與蝗飛龍御月作秋涼蒼波改色屯雲黃  
天旋雷動玉塵香起搜十裂照坐光跣跌牛噉安且詳  
動搖天關出瓊漿壬公飛空天女藏三伏遇井了不嘗  
釀為真一和而莊三杯儼如侍君王湛然寂照非楚狂  
終身不入無功鄉

蜜酒歌

蘇軾

真珠為漿玉為醴六月田夫汗流泚不如春甕自生香  
蜂為耕耘花作米一日小沸魚吐沫二日眩轉清光活

三日開甕香滿城快瀉銀瓶不須撥百錢一斗濃無聲  
甘露微濁醞醕清君不見南園採花蜂似雨天教釀酒  
醉先生先生年來窮到骨問人乞米何曾得世間萬事  
真悠悠蜜蜂大勝監河侯

考亭陳國器以家釀餉吾友人卓民表民表以  
飲余香味色皆清絕不可名狀因為製名曰

武彝仙露仍賦一首

宋朱松

二年飲水閩中邨忽見玉醴傾蠻尊涓涓醞醕灌熱腦

耿耿沆濯明朝暎早塵久漲城市暗客夢欲挽江湖吞  
何人遠致雙鯉信知我來叩羅雀門不須邀月已清絕  
尚恐鬢齒當微温要從華池汲真液豈獨玄鬢孳愁根  
微芒已識投轄客斌媚似返當壚魂竒功誰續伯倫頌  
妙意要與淵明論胸中我自涇渭筆下君已傾崑崙  
詩成寄與約他日飲君與我空瓶盆

林知常惠白酒六尊仍示酒法作十韻謝之

宋  
王十朋

老大生涯付杯酒種秫辛勤三百畝東臯遺法已失傳  
蜜汁釐漿不通口邇來軟飽經月無豈有清歡對朋友  
百錢強就邛醪醉終夜蔬腸作雷吼先生祇把文字耕  
妙意能施杜康手憐我新愁餘萬斛那更澆腸無五斗  
分惠青州六從事秘法兼蒙傳肘後便同北海歌不空  
免似東坡歎烏有慨予偃蹇老更饕感激故人情意厚  
會須續遣白衣來籬畔黃花欲重九

家釀紅酒美甚戲作

宋  
曾幾

麴生竒麗乃如許酒母穠華當若何向人自作醉時面  
遣我寧不蒼顏酖得非琥珀所成就更有丹砂想盪磨  
可憐老杜不對汝但愛引頸舟前鷺

生酒歌

宋 楊萬里

生酒清如雪煮酒赤如血煮酒不如生酒冽煮酒只帶  
煙花氣生酒不離泉石味石根泉眼新汲將麴米釀出  
春風香坐上豬紅間熊白甕頭鴨綠變鷺黃先生一醉  
萬事已那知身在塵埃裏

蘇子翼送黃精酒

宋朱弁

仙經何物堪却老較功無如太陽草龍銜雞銜名雖異  
免公羊公事可考蘇君真是神仙喬橘井陰功貫穹昊  
雲笈書成數萬言銀闕珠宮用心早獨知此物有竒效  
福地名山為儲寶不憚林泉新斲掘斥去杵臼謝篩擣  
况從高士論麴糜更課公田收秫稻一朝靈液浮甌盎  
三冬浩氣生襟抱且欣軟飽得澆腸漫說逆流上補腦  
眼碧那憂散黑花髮斑故應還翠葆賈傅只嫌松醪陋



劉墮敢誇桑落好直須五斗論解醒寧待三杯乃通道  
誰知萬里落旄人亦許匏尊自傾倒為君喚迴雪窖春  
八載羈愁供一掃曼倩宜分此日桃安期莫詫他年棗  
何煩更採石斛花已覺容顏不枯槁根連石室喜入夢  
句擬桐谿媿摛藻平生我亦愛書札朱髓綠腸勤探討  
幸君汲引成此志鶴駕駸駸望仙島吞腥啄腐非夙心  
歲晚茲言良可保

虞舜卿送橙酒

金  
李純甫

屏山持律不作詩硯塵筆禿紫蛛絲枯腸燥吻思憂憂  
法當以酒疏淪之何物督郵風味惡振觸閒愁無處著  
苦思新釀壓橙香世間那有揚州鶴乞詩送酒並柴門  
瀛洲仙裔令公孫肝腸憤痒芒角出傾瀉長句如翻盆  
怪汝胸中雲夢大老我眼皮危塞破徑呼短李與黔王  
快取錦囊收玉唾

善之入雪蘭皋置酒小詩紀坐中事

元年  
獻

病翁禁酒仍禁脚不省人間有行樂主人最善客善之  
邀我來同雞黍約清樽快吸船落埭頗悔從前謝杯杓  
故人久別如此酒一時傾倒慰離索更擘新筍供春淘  
孤泉槐葉未須學髮勤入鼎資過熟老饕咨吞不勞嚼  
人生難得是合併開口一笑良不惡呼車載我雨中歸  
阿香推車散飛電分明戒我輕破戒故把春衫都濕却  
我亦投牀作雷吼無數殘紅枕邊落

招子昂飲歌

元

戴表元

與君相逢難草草與君相逢苦不早人生何處少泥塗  
此日飄零武林道武林城中馬如雲閉屋狂歌人不聞  
狂歌自笑君亦笑依然狂絕不如君君歌豈是真狂者  
青衫少日春瀟灑至今俊筆五花紋最惜青眸十行下  
虛名何用等灰塵不如世上蓬蒿人黃金偏趨不貧室  
白髮難老無愁身風雨無情亦如此淒淒但聒窮人耳  
不見朱樓高到天鳳簫龍管連朝起連朝笙管可奈何  
我歌且止須君歌青天白雪望不極坐見綠水生層波

我生何為被狂惱  
江頭魚肥新酒好  
從今作樂擽醉倒  
與君相逢難草草

醉時歌

元黃庚

茫茫古堪輿何日分九州  
九州封域如許大  
僅能著我胸中愁  
澆愁須是如澠酒  
麴波釀盡銀河流  
貯以倒海千頃黃金壘  
酌以傾江萬斛玻瓈舟  
天為青羅幕月為白玉鉤  
月邊天孫織雲錦製成五色蒙茸裘  
披裘把酒踏月窟  
長揖北斗相勸酬  
一飲一千石一醉三千秋  
高

卧五城十二樓剛風冽冽吹酒醒起來披髮騎赤虬大  
呼洪崖拉浮丘飛上崑崙山頂頭下視塵寰一培塿揮  
斤八極逍遙遊

僕嘗夜夢從彥成飲彥成曰此荔枝漿也飲之  
令人壽予能為我賦之當贈三百壺余自口  
占一詩覺乃夢也及會玉山聞彥成釀酒果  
名荔枝漿以夢白之不覺大笑玉山曰君當  
書此詩吾當與子致酒以質所夢因莞爾書

之彥成見之必更一笑也

元 陳 基

涼州莫謾誇葡萄中山枉詫松為醪仙人自釀真一酒  
洞庭春色嗟徒勞瓊漿滴盡生荔枝玉露瀉入黃金卮  
一杯入口壽千歲安用火棗並交梨不願青州覓從事  
不願步兵為校尉但令喚鶴共呼鸞日日從君花下醉

新麴米酒歌

元 蒲道源

驕陽行空勢方烈刈麥農夫寧憚熱天旋雷動飛玉塵  
霧勃雲蒸成麴蘖麥秋方罷還插秧擺極西風千頃黃

腰鎌肩擔行相逐共趁晴色催登場碓舂糠粃光如雪  
汲泉浙米令清潔炊糜糝麩同糝和元氣細縕未分裂  
甕中小沸微有聲魚沫吐盡秋江清脫巾且漉仍且飲  
陶然自覺春風生君不見淵明有田惟種秫醉裏作詩  
聊自述又不見幽風十月穫稻忙春酒介壽俱徜徉但  
願年年遇豐稔更須三萬六千場

蒲萄酒

元周權

翠虬夭矯飛不去領下明珠脫寒露纍纍千斛晝夜春



列甕滿浸秋泉紅數宵醞月清光轉穠腴芳髓蒸霞暖  
酒成快瀉宮壺香春風吹凍玻瓈光甘逾瑞露濃欺乳  
麴生風味難通譜縱教典却鷓鴣裘不將一斗博涼州

紅酒歌

元 楊維禎

揚子渴如馬文園宰官特賜桃花源  
桃花源頭釀春酒  
滴滴真珠紅欲然左官忽落東海邊  
渴心鹽井生炎煙  
相呼西子湖上船蓮花博士飲中仙  
如銀酒色未為貴  
令人長憶桃花泉膠州判官玉牒賢  
憶昔同醉瓊林筵

別來南北不通問夜夢玉樹春風前朝來五馬過陋廛  
贈以同袍五色彩副以五鳳樓頭箋何以澆我磊落抑  
塞之感慨桃花美酒斗十千垂虹橋下水拍天虹光散  
作真珠涎吳娃鬪色櫻在口不放白雪盈人顛我有文  
園渴苦無曲奏鴛鴦絃預恐沙頭雙玉盡力醉未與長  
瓶眠徑當垂虹去鯨量吸百川我歌君扣舷一斗不惜  
詩百篇

麻姑酒歌

明  
杜  
庠

麻姑之山撐半空麻姑之水飛長虹奔流到城不到海  
釀春盡入糟丘中前年足跡半天下曾訪麻姑當盛夏  
麻姑酌我三百杯玉山頽然醉方罷麒麟之脯擘薦酒  
世間此味何曾有醒來欲再訪麻姑萬疊千重雲有無  
君家畱我亦不減此味酒泉如海何須沽

五言律

詠雲酒

唐駱賓王

朔空曾紀歷帶地舊疏泉色汎臨碣瑞香流赴蜀仙款

交欣散玉洽友悅沈錢無復中山賞空吟吳會篇

酒

唐李嶠

孔生洽良儔陳筵幾獻酬臨風竹葉滿湛月桂香浮每  
接高陽宴長陪河朔遊會從玄石飲雲雨出圓丘

雪中酒熟欲携訪吳監先寄此詩

唐白居易

新雪對新酒憶同傾一杯自然須訪戴不必待延枚陳  
榻無辭解袁門莫嬾開笙歌與談笑隨分自將來

雪夜對酒招客

白居易

帳小青氈煖杯香綠蟻新醉憐今夜月歡憶去年人  
閣落燈花燼閒生草坐塵慙懃報絃管明日有嘉賓

酒醒

唐元稹

飲醉日將盡醒時夜已闌暗燈風焰曉春席水窗寒未  
解紫身帶猶傾墜枕冠呼兒問狼籍疑是夢中驩

家釀

宋朱子

聞道兵廚盛春泉響膈筍定知盈榼送不待扣門求沈

瀧應難比茅柴祇自羞此身從法縛好客為公畱

酒市

朱子

聞說崇安市家家麴米春樓頭邀上客花底覓南鄰詎  
有當墟子應無折券人勸君渾莫問一酌便還醇

對酒

宋陸游

密篠持苫屋寒蘆用織簾鏡肩柴熟菴蓴菜豉初添黃  
甲如盤大紅丁似蜜甜街頭桑葉落相喚指青帘

盧中之載酒舟中分韻得明字

宋 趙師秀

閒人閒處住，載酒荷高情。  
小舍寧容客，同舟却向城。  
弄花忘晝暑，憂穀念秋晴。  
歸路雖無月，銀河亦自明。

涯翁示獨酌二詩，序云是日飲松江酒，次韻奉

謝

明 顧清

城闕非長往，山林是夙期。  
時開問字酒，不賦解嘲詩。  
綠樹停觴久，紅闌點筆遲。  
奚童斟酌慣，深淺自能知。

元旦後一日劉德儀送酒

明 沈周

使者雙瓶至蓬門向晚開  
停肩慰泥滑解幕省香來  
染指憐佳味挑燈引細杯  
明朝攜小榼江上候新梅

閩中與吳元翰過馬季聲家酌

明吳兆

多君新釀熟邀我客中間  
剖橘香生手銜杯暖汎顏  
敗藤紫格下爭雀墮籬間  
門巷斜鄰寺朝昏易往還

五言排律

早飲湖州酒寄崔使君

唐白居易



一榼扶頭酒泓澄瀉玉壺十分蘸甲酌澌澌滿銀盃捧  
出光華動嘗看氣味殊手中稀琥珀舌上冷醍醐瓶裏  
有時盡江邊無處沽不知崔太守更有寄來無

答皇甫十郎中秋深酒熟見憶 白居易

煙景冷蒼茫秋深夜夜霜為思池上酌先覺甕頭香未  
暇傾巾漉還應染指嘗醍醐慙氣味琥珀讓晶光若許  
陪歌席須容散道場月中齋戒畢猶及菊花黃

七言律

錢湖州以箸下酒李蘇州以五醖酒相次寄到

無因同飲聊詠所懷

唐白居易

勞將箸下忘憂物寄與江城愛酒翁  
鰲脚三州何處會  
甕頭一盞幾時同  
傾如竹葉盈樽綠  
飲作桃花上面紅  
莫怪殷勤醉相憶  
曾陪西省與南宮

橋亭卯飲

白居易

卯時偶飲齋時卧林下  
高橋橋上亭松影過窗眠始覺  
竹風吹面醉初醒  
就荷葉上包魚鮓  
當石渠中浸酒瓶

生計悠悠身兀兀甘從妻喚作劉伶

李羽處士寄惠新醞走筆戲酬

唐  
溫庭筠

高譚有伴還成藪沈醉無期即是鄉  
已恨流鶯欺謝客更將浮蟻與劉郎  
簷前柳色分張綠窗外花枝借助香  
所恨玳筵紅燭夜草玄寥落近廻塘

和魯望看壓新醅次韻

唐  
皮日休

一簣松花細有聲旋將渠椀撇寒清  
秦吳只恐籊來近

劉項真應釀得平酒德有神多客頌醉鄉無貨没人爭  
五湖煙水郎山月合向樽前問姓名

看壓新醅寄懷襲美

唐  
陸龜蒙

曉壓糟牀漸有聲旋如荒澗野泉清  
身前古態熏應出世上愁痕滴合平  
飲啄斷年同鶴儉風波終日看人爭  
樽中若使常能淥兩綬通侯總強名

白酒兩瓶送崔侍御

唐  
徐夔

雪化霜融好潑醅滿壺冰凍向春開  
求從白石洞中得

金八八八八八  
卷二百四十一  
攜向百花巖畔來幾夕露珠寒貝齒一泓銀水冷瓊杯  
湖邊送與崔夫子誰見嵇山盡日顏

斷酒

徐夔

因論沈酒覺前非便碎金壘與羽卮採茗早馳三蜀使  
看花甘負五侯期窗間近火劉伶傳坐石新銘管仲辭  
此事十年前已說匡廬山下老僧知

依韻和正仲寄酒因戲之

宋梅堯臣

上字黃封誰可識偷傳王母法應真清淮始變醕猶薄

向水新來味更醇  
欲擬比酥酥少色  
曾持勸客客何人  
紅梅雖是吾家物  
老去無心一醉春

謝孫抗員外惠酒

宋 余靖

白衣遠達到江樓  
報道攜壺助勝遊  
醉眼便堪終日富  
離腸先破一春愁  
梅梢背嶺開猶晚  
雪片當風舞未休  
此景滿懷方得意  
不須千釀敵封侯

謝堯夫寄新酒

宋 韓維

故人一別兩重陽  
每欲從之道路長  
有客忽傳龍坂至

開樽如對馬軍嘗定將瓊液都為色疑有金英密借香  
却笑當年彭澤令籬邊終日歎空觴

庚辰歲正月十二日天門冬酒熟余自漉之且

漉且嘗遂以大醉

宋蘇軾

自撥牀頭一甕雲幽人先已醉濃芬天門冬熟新年喜  
麴米春香並舍聞菜圃漸疎雲漠漠竹扉斜掩雨紛紛  
擁裘睡覺知何處吹面東風散纈紋

新釀桂酒

蘇軾

搗香篩辣入瓶盆  
盞盞春谿帶雨渾  
收拾小山藏社甕  
招呼明月到芳樽  
酒材已遣門生致  
菜把仍叨地主恩  
爛煮葵羹斟桂醕  
風流可惜在蠻邨

真一酒

蘇軾

撥雪披雲得乳泓  
蜜蠶又欲醉先生  
稻垂麥仰陰陽足  
器潔泉新表裏清  
曉日著顏紅有暈  
春風入髓散無聲  
人間真一東坡老  
與作青州從事名

同家弟用前韻謝判府惠酒

宋陳與義



銜杯樂聖便稱賢無酒猶堪卧甕間使者在門催僕僕  
麴車入夢正班班不煩白水真人力來自青城道士山  
千載王弘今並美未應杞菊賦寒慳

對酒

陳與義

陳畱春色撩詩思一日搜腸一百迴燕子初歸風不定  
桃花欲動雨頻來人間多待須微祿夢裏相逢記此杯  
白竹扉前容醉舞煙邛渺渺欠高臺

夜宿房谿飲野人張珣家桂葉鹿蹄酒其法以

桂葉為餅以鹿蹄煮酒釀以八月過是期味

減云

宋  
楊萬里

桂葉採青作麴投鹿蹄煮醪趁涼筭落杯瑩滑水中水  
過口森嚴菊底秋玉友黃封猶退舍藿湯蜜汁更輸籌  
野人未許傳醕法剩買雙瓶過別州

余與客嘗茶藤瀉酒客求其法因戲答之

楊萬里

月中露下摘茶藤瀉酒銀瓶花倒垂若要花香薰酒骨

莫教玉醴濕瓊肌一杯墮我無何有百罰知君亦不辭  
勅賜深卮能幾許野人時復一中之

酒

宋 徐璣

才傾一盞碧澄澄自是山妻手法成不遣水多防味薄  
要令麴少得香清涼從荷葉風邊起煖向梅花月裏生  
世味總無如此味深知此味即淵明

秋露白酒熟卧聞槽聲喜而得句可行當同賦

也

元 許有壬

治麴辛勤夏竟秋奇功今日遂全收日華煎露成真液  
泉脉穿巖咽細流不忍潑醅甕而且教雷響在牀頭  
老懷磊磊行澆盡三徑黃花兩玉舟

碧筍飲次胡丞韻

元張昱

小刺攢攢綠滿莖看揜羅袖護輕盈分司御史心先醉  
多病相如渴又生銀浦流雲雖有態銅盤清露寂無聲  
當年欲博千金笑故作風荷帶雨傾

夏正夫邀飲蛇酒

明杜庠

藤峽香醪遠寄來一樽公館晚涼開  
功同薏苡能消瘴色勝葡萄乍潑醅  
錢在杖頭宜贖買臂懸弓影莫深猜  
主人情重憐衰病入夜張燈再舉杯

雪中崇之送麻姑酒一尊

明費宏

醒眼寒窗對白虛馬軍來值卧瓶  
初呼童旋覓團臍蠟謀婦方烹巨口魚  
蕉葉淺斟能稍稍梅花欲放正踈踈  
心交久矣醇醪醉豈必盱泉味有餘

沽酒

明周用

一春白髮鬪絲長無奈春歸喚酒嘗日曬一林梅子熟  
風吹滿店柳花香漢江初潑葡萄綠銀海頻浮琥珀光  
消得百年三萬日不妨還醉六千場

雪酒為孫司徒賦奉次涯翁先生

明邵寶

玄酒曾聞備大烹釀來寒雪品尤清也知承露能高致  
須信藏冰為曲成光動夜杯如有物暖銷春甕本無聲  
相看莫謂人間味一滴先天萬古情

戲和石潭嘗酒

明 顧清

不惜糟牀劈作柴已呼兒子旋安排只愁新甕能幾榼  
遂有高軒駐兩階永夜燭光隣壁駭他年談苑幾人偕  
細君不學劉伶婦晚出雙魚更自佳

次韻謝凌季行送新釀六尊

明 吳寬

寒掩蓬門午不開東鄰新釀叩門來黃封內法何從授  
紅印他家自滿堆飲量笑添清澮闊吟肩醉聳玉山嵬  
青州舊例今重舉從事多能未減裁

酒熟志喜

明 王 鏊

常年送酒媿諸鄰斗覺今年富十分  
水法特教擔柳毅麴材先已謝桐君  
牀頭夜滴晴塔雨甕面香浮暖閣雲  
莫笑陶公巾自漉年來正策醉鄉勲

嘗酒用前韻

明 陸 容

飲盡君家碧甕春香痕狼籍上羅巾  
詩壇不遣前盟負郎署應憐此會新  
歸騎已聞珂撼玉畱人莫待燭銷銀  
步兵故有風流在笑殺金貂買醉人



弟洛為猗氏學諭以襄陵酒方見示如法釀造

良佳賦此答意

明  
李濂

襄陵自昔稱名酒猗氏於今得秘方傳示故園知汝意  
釀成新味與誰嘗金盤滴露泠泠白玉椀浮春冉冉香  
倚甕題詩寄吾弟西齋風雨憶聯牀

七言排律

詠家醞十韻

唐  
白居易

獨醒從古笑靈均長醉如今數伯倫舊法依稀傳自杜

新方要妙得於陳井泉王相資重九麴蘖精靈用上寅  
釀糯豈勞炊范黍撇筍何假漉陶巾常嫌竹葉猶凡濁  
始覺榴花不正真甕揭開時香酷烈瓶封貯後味甘辛  
捧疑明水從空化飲似陽和滿腹春色洞玉壺無表裏  
光搖金盞有精神能消忙事成間事轉得憂人作樂人  
應是世間賔聖物與君還往擬終身

五言絕句

看釀酒

唐王績

六月調神麴正朝汲美泉從來作春酒未省不經年

過酒家

王績

竹葉連糟翠蒲萄帶麴紅相逢不令盡別後為誰空

其二

對酒但知飲逢人莫強牽倚壚便得睡橫甕足堪眠

戲主人

唐孟浩然

客醉眠未起主人呼解醒已言雞黍熟復說甕頭清

醉後

唐權德輿

美祿與賢人相逢自可親願將花柳月盡賞醉鄉春

敕賜長壽酒

權德輿

恩霑長壽酒歸遺同心人滿酌共君醉一杯千萬春

酬馬侍郎寄酒

唐韓愈

一壺情所寄四句意能多秋到無詩酒其如月色何

李舍人少尹惠家醞一小榼立書絕句

唐竇牟

禁鎖天漿嫩虞行夜月寒一瓢那可醉應遣試嘗看

酬范侍御

唐鮑溶

聞道中山酒一杯  
千日醒黃鶯似傳語  
勸酒太丁寧

春釀

唐趙嘏

春釀正風流  
梨花莫問愁  
馬卿思一醉  
不惜鷓鴣裘

醉眠

唐杜牧

秋醪雨中熟  
寒齋落葉中  
幽人本多睡  
更酌一罇空

獨酌

杜牧

窗外正風雪  
擁爐開酒缸  
何如釣船雨  
篷底睡秋江

閒夜酒醒

唐皮日休

醒來山月高孤枕羣書裏酒渴漫思茶山童呼不起

雜詩絕句

宋梅堯臣

河畔有釣翁團泥為甕坐坐想秦人聲思傾杜陵酒

飲

金李俊民

竹葉杯中醪金釵坐上春淺斟低唱境猶道是粗人

碧筩飲

明高啟

綠觴卷高葉醉吸清香度酒瀉正何如風傾曉盤露

平望夜泊

明 王穉登

月下壓酒聲將船繫楊柳  
明日到家近不須沾一斗

六言絕句

寄李袁州桑落酒

唐 郎士元

色比瓊漿猶嫩香同甘露  
仍春十千提攜一斗遠送瀟湘故人

七言絕句

戲問花門酒家翁

唐 岑 參

老人七十仍沽酒，千壺百甕花門口。  
道傍榆莢巧似錢，摘來沽酒君肯否？

謝嚴中丞送青城山道士乳酒一餅

唐杜甫

山餅乳酒下青雲，氣味濃香幸見分。  
鳴鞭走送憐漁父，洗盞開嘗對馬軍。

設酒寄獨孤少府

唐王建

自看和釀一依方，緣著松花色較黃。  
不分君家新酒熟。



好時收得被回將

招客

唐  
白居易

日午微陰且暮寒  
春風冷峭雪乾殘  
碧氈帳下紅爐畔  
試為來嘗一盞看

自勸

白居易

憶昔羈貧應舉年  
脫衣典酒曲江邊  
十千一斗猶賒飲  
何況官供不著錢

先醉

唐  
元稹

今日樽前敗飲名三杯未盡不能傾  
怪來花下長先醉  
半是春風蕩酒情

獨醉

元稹

一樹芳菲也當春漫隨車馬擁  
行塵桃花解笑鶯能語  
自醉自眠那藉人

劉兵曹贈酒

唐張籍

一餅顏色似秋泉  
開向新栽小竹前  
飲罷身中更無事  
移牀獨就夕陽眠

花下醉

唐李商隱

尋芳不覺醉流霞倚樹沈眠日已斜  
客散酒醒深夜後更持紅燭賞殘花

春夕酒醒

唐皮日休

四絃纔罷醉蠻奴醺醪餘香在翠爐  
夜半醒來紅蠟短一枝寒淚作珊瑚

自遣

唐陸龜蒙

醞得秋泉似玉容比於雲液更應濃  
思量北海徐劉輩

枉向人間號酒龍

和皮襲美徵友人酒

陸龜蒙

凍醪初漉嫩如春  
輕蟻漂漂雜藥塵  
得伴方平同一醉  
明朝應作蔡經身

和襲美醉中以一壺并一絕見寄次韻

陸龜蒙

酒痕衣上雜莓苔  
猶憶紅螺一兩杯  
正被遠籬荒菊笑  
日斜還有白衣來

禁直和人飲酒

唐鄭畋

卉醴陀花物外香  
清釀標格勝椒漿  
我來尚有釣天會  
猶得金樽半日嘗

詠酒

唐汪遵

萬事銷沈向一杯  
竹門啞軋為風開  
秋宵睡足芭蕉雨  
又是江湖入夢來

對酒

唐韋莊

何用巖棲隱姓名  
一壺春酎可忘形  
伯倫若有長生術

直到如今醉未醒

和陳表用員外求酒

宋 徐鉉

暑天頻雨亦頻晴  
簾外閒雲重復輕  
珍重一壺訓絕唱  
向風遙想醉吟聲

次韻趙德麟雪中惜梅且餉柑酒

宋 蘇軾

蹀躞嬌黃不受鞿  
東風暗與色香歸  
偶逢白墮爭春酒  
遣入王孫玉笋飛

贈孫莘老

蘇軾

烏程霜稻襲人香  
釀作春風雪水光  
時復中之徐邈聖  
母多酌我次公狂

冬日田園雜興

宋范成大

煮酒春前臘後蒸  
一年長饗甕頭清  
塵居何似山居樂  
秫米新來禁入城

正月五日以送伴借官侍宴集英殿口號

宋楊萬里

千官拜舞仰虛皇  
奉上瑤池萬壽觴  
殿裏雙傳送御酒  
檻前一曲繞虹梁

宮詞

宋 花藥夫人

酒庫新修近水傍  
潑醅初熟五雲漿  
殿前供御頻宣索  
進入花間一陣香

飲歸

元 方 回

潑灑紅深百盞澆  
醉歸不覺路迢迢  
臨分情味慙慙甚  
暗遣人扶過畫橋



中山府

元 陳孚

馬上秋雲擁節旄，霜花如雪點征袍。  
要畱醒眼看天地，不向山中飲濁醪。

吳中親舊遠寄新酒

明 高啟

雙壺遠寄碧香新，酒內情多易醉人。  
上國豈無千日釀，獨憐此是故鄉春。

子烜買紅酒

明 張以寧

吳江紅酒紅如霞，憶著故園桃李花。  
羊角山前幾迴醉。

女須嗔汝未還家

內法酒出大官者嘗四叨燕賜及諸大璫所釀  
亦近之雖似清美但或甘或冽多未得平飲  
之令人熱及好渴不堪醉也

明  
王世貞

黃封銀甕出當筵側弁須防執法前何似家園紅友在  
一甌相藉柳風眠

襄陵酒出平陽襄陵縣色黃白香醲而所致者

多過甘不堪醕獨趙兵巡齋兩甌味極殊絕  
累日不厭以無甘味故也

王世貞

涓然甘露布松梢似玉如飴味更饒尚有碧霄真沆瀣  
無將一滴貯天瓢

蒲州酒清冽芬旨與羊羔並而不羶遠出桑落  
襄陵之上特以遠故不易得

王世貞

屑瓊為麴露為漿超出人間色味香應從帝女傳遺法  
不向河東羨索郎

秋露白出山東藩司甘而醜色白性熱余絕不  
喜之臬司因為改造終不能佳也惟德府王  
親薛生者收蓮花露釀之清芬特甚第不可  
多得耳

王世貞

玉露凝雲在半空銀槽虛自滴秋紅薛家新樣蓮花色  
好把清樽傍碧筒

章丘酒去濟南不百里清味雋永自是名勝而  
人乃傳秋露何也謝少谿侍郎者佳

王世貞

玉缸春色暖融融一點清冷便不同肯向邯鄲鬪穠豔  
自誇林下謝家風

淮安酒有一種差佳曰苦蒿味近苦而冽世人

重甘良可笑也

王世貞

漕河兩岸碧欄杆瀉出春缸琥珀寒任道儂家勝崖蜜  
爭如橄欖有回甘

蕩口酒范氏華氏以鷺肫蕩水釀絕如菜竹色

而清旨爽冽醕之涼風生齒咽間美而不醒  
南酒第一也余嘗過其地醉者兩日

王世貞

波如竹色酒如波勸客仍傾翡翠螺縱醉欲拋拋不得  
教人無奈憶時何

行抵平原而酒忽濁作此自嘲 王世貞

使君虛忝舊青州無那平原有督郵解使璽書今夜至  
不教封作醉鄉侯

王元美分守浙西書來謂烏程酒濁如涇水黑

若油也戲為解嘲

明 王叔承

試問烏程第一筍醉仙翻作酒家羞三千年上探星海  
未必黃河是濁流

荊州公餽酒

明 宋登春

菱葉青青水荇齊  
透籬黃蝶菜苗肥  
夕陽誰送山人醉  
坐看兒童跨犢歸

其二

秋風嫋嫋熟黃梁池上鷺肥酒更香醉裏不妨學楚語  
竹枝歌好和漁郎

醉歸

明 吳孺子

風磴雲梯手自扶飛花如意引歸途莫教水氣醒餘醉  
寧使兒童厭再沽

舟過陸州謝鄉人余五郎送酒

明 王寅

新醪香豔石榴花贈得雙樽不用賒為謝客愁消得盡



殘年一路醉還家

山下買酒

明何其漁

隔浦漁家傍酒家  
漁罾掩映酒帘斜  
探囊恰好供歸客  
買得黃魚并杏花

釀酒

明梁小玉

麴部尚書譜不畱  
椒花細雨列香流  
釀王家法應如是  
新拜雲谿女醉侯

御定佩文齋詠物詩選卷二百四十三

欽定四庫全書

集部

御定佩文齋詠物詩選卷二百四十四至  
二百五十八

詳校官侍郎臣李封

主事銜臣徐以坤覆勘

總校官檢討臣何思鈞

校對官中書臣高中

謄錄監生臣帥應龍

欽定四庫全書

御定佩文齋詠物詩選卷二百四十四

茶類

五言古

答族姪僧中孚贈玉泉仙人掌茶

唐李 白

嘗聞玉泉山山洞多乳窟仙鼠如白鴟倒懸深谿月茗  
生此石中玉泉流不歇根柯灑芳津採服潤肌骨叢老

卷綠葉枝枝相接連曝成仙人掌似拍洪崖肩舉世未  
見之其名定誰傳宗英乃禪伯投贈有佳篇清鏡燭無  
鹽顧慙西子妍朝坐有餘興長吟播諸天

巽上人以竹間自採新茶見贈酬之以詩

唐  
柳宗元

芳叢翳湘竹零露凝清華復此雪山客晨朝掇靈芽蒸  
煙俯石瀨咫尺凌丹崖圓方麗竒色圭璧無纖瑕呼兒  
爨金鼎餘馥延幽遐滌慮發真照還源蕩昏邪猶同甘

露飲佛事熏毘耶吐此蓬瀛侶無乃貴流霞

睡後茶興憶楊同州

唐白居易

昨晚飲太多嵬我連宵醉今朝餐又飽爛熳移時睡  
足摩挲眼眼前無一事信脚遠池行偶然得幽致婆婆  
綠陰樹斑駁青苔地此處置繩牀傍邊洗茶器白磁甌  
甚潔紅爐炭方熾沫下麴塵香花浮魚眼沸盛來有佳  
色燕罷餘芳氣不見楊暮巢誰人知此味

龍山人惠石廩方及團茶

唐李羣玉

客有衡岳隱遺予石廩茶自云凌煙露採掇春山芽珪  
壁相壓疊積芳莫能加碾成黃金粉輕嫩如松花紅爐  
爨霜枝越兒斟井華灘聲起魚眼滿鼎漂清霞凝澄坐  
曉銜病眼如蒙紗一甌拂昏寐襟鬲開煩拏顧渚與方  
山誰人留品差持甌默吟味搖膝空咨嗟

茶塢

唐  
陸龜蒙

茗地曲隈回野行多繚繞向陽就中密背澗差還少遙  
盤雲髻慢亂簇香篝小何處好幽期滿巖春露曉

茶人

陸龜蒙

天賦識靈草自然鍾野姿  
閒年北山下似與東風期  
雨後探芳去雲間幽路危  
惟應報春鳥得共斯人知

茶笋

陸龜蒙

所孕和氣深時抽玉茗短  
輕煙漸結華嫩蘂初成  
管尋來青靄曙欲去紅雲  
暖秀色自難逢傾筐不曾滿

茶焙

陸龜蒙

左右擣凝膏朝昏布煙縷  
方圓隨樣拍次第依層取  
山

謠縱高下火候還文武見說焙前人時時炙花脯

茶塢

唐皮日休

開尋堯氏山遂入深深塢種薺已成園栽葭寧記畝石  
窪泉似掬巖罅雲如縷好是夏初時白花滿煙雨

茶笋

皮日休

裒然三五寸生必依巖洞寒恐結紅鉛暖宜銷紫汞圓  
如玉軸光脆似瓊英凍每為遇之疎南山挂幽夢

茶舍

皮日休



陽崖枕白屋幾口嬉嬉活棚上汲紅泉焙前蒸紫蕨乃  
翁研茗後中婦拍茶歇相向掩柴扉清香滿山月

茶焙

皮日休

鑿彼碧巖下恰應深二尺泥易帶雲根燒難礙石脉初  
能燥金餅漸見乾瓊液九里共杉林相望在山側

煮茶

皮日休

香泉一合乳煎作連珠沸時看蟹目濺乍見魚鱗起聲  
疑松帶雨葳恐煙生翠儻把溼中山必無千日醉

得雷太簡自製蒙頂茶

宋梅堯臣

陸羽舊茶經一意重蒙頂比來唯建谿團片敵湯餅顧  
渚及陽羨又復下越茗近來江國人鷹爪夸雙井凡今  
天下品非此不覽省蜀苻久無味聲名謾馳騁因雷與  
改造帶露摘牙頰自煮至揉焙入碾只俄頃湯嫩乳花  
浮香新舌甘永初分翰林公豈數博士冷醉來不知惜  
悔許已向醒重思朋友義果決在勇猛倏然乃以贈蠟  
囊收細梗吁嗟茗與鞭二物誠不幸我貧事事無得之

似贅癭

呂晉叔著作遺新茶

梅堯臣

四葉及三游共家原坂嶺歲摘建谿春爭先取晴景大  
窠有壯液所發必竒穎一朝團焙成價與黃金逞呂侯  
得鄉人分贈我已幸其贈幾何多六色十五餅每餅包  
青弱紅籤纏素縹屑之雲雪輕啜已神魄惺會待嘉客  
來侑談當晝永

李仲求寄建谿洪井茶七品云愈少愈佳未知

嘗何如耳因條而答之

梅堯臣

忽有西山使始遺七品茶末品無水暈六品無沈粗五  
品散雲脚四品浮粟花三品若瓊乳二品罕所加絕品  
不可議甘香焉等差一日嘗一甌六腑無昏邪夜枕不  
得寐月樹聞啼鴉憂來唯覺衰可驗唯齒牙動搖有三  
四妨咀連左車髮亦足驚悚踈踈點霜華乃思平生遊  
但恨江路賒安得一見之煮泉相與誇

茶壠

宋  
蔡襄

造化曾無私亦有意所嘉夜雨作春力朝雲護日車千  
萬碧天枝戢戢抽靈芽

採茶

蔡襄

春衫逐紅旗散入青林下陰崖喜先至新苗漸盈把競  
攜筠籠歸更帶山雲寫

造茶

蔡襄

糜玉寸陰間搏金新範裏規呈月正圓勢動龍初起出  
焙幽花全爭誇火候是

試茶

蔡襄

兔毫紫甌新蟹眼清泉煮雪凍作成花雲間未垂縷願  
爾池中波去作人間雨

飲修仁茶

宋孫覲

煙雲吐長崖風雨暗古縣竹輿頰兩肩弛擔息微倦茗  
飲初一嘗老父有芹獻幽姿絕媚嫵著齒得瞑眩昏昏  
嗜睡翁喚起風灑面亦有不平心盡從毛孔散

龍門茶屋圖

元倪瓚

龍門秋月影茶屋白雲泉不與世人賞  
瑶草自年年  
上  
有天池水松風舞淪漣何當躡飛鳧  
去采池中蓮

七言古 附長短句

西山蘭若試茶歌

唐 劉禹錫

山僧後檐茶數叢春來暎竹抽新茸  
宛然為客振衣起  
自傍芳叢摘鷹背斯須炒成滿室香  
便酌砌下金沙水  
驟雨松聲入鼎來白雲滿盃花徘徊  
悠揚噴鼻宿醒散  
清峭徹骨煩襟開陽崖陰嶺各殊氣  
未若竹下莓苔地

炎帝雖嘗未解煎桐君有錄那知味新芽連拳半未舒  
自摘至煎俄頃餘木蘭沾露香微似瑤草臨波色不如  
僧言靈味宜幽寂采采翹英為嘉客不辭緘封寄郡齋  
甑井銅爐損標格何況蒙山顧渚春白泥赤印走風塵  
可知花蘂清冷味須是眠雲跂石人

西嶺道士茶歌

唐  
溫庭筠

乳竇濺濺通石脉綠塵愁草春江色澗花入井水味香  
山月當人松影直仙翁白扇霜烏翎拂壇夜讀黃庭經



疎香皓齒有餘味更覺鶴心通杳冥

謝僧寄茶

唐李咸用

空門少年初志堅摘芳為藥除睡眠匡山茗樹朝陽偏  
暖萌如爪拏飛鳶枝枝膏露凝滴圓參差失向兜羅綿  
傾筐短甌蒸新鮮白紵眼細勻於研甌排古砌春苔乾  
殷勤寄我清明前金槽無聲飛碧煙赤獸呵冰急鐵喧  
林風夕和真珠泉半匙青粉攪潺湲綠雲輕綰湘娥鬢  
嘗來縱使重支枕蝴蝶寂寂空掩關

月兔茶

宋蘇軾

環非環玦非玦中有迷離白兔兒一似佳人帶上月月  
圓還缺缺還圓此月一缺圓何年君不見鬪茶公子不  
忍鬪小團上有雙銜綬帶雙飛鸞

試院煎茶

蘇軾

蟹眼已過魚眼生颼颼欲作松風鳴蒙茸出磨細珠落  
眩轉遶甌飛雪輕銀餅瀉湯誇第二未識古人煎水意  
君不見昔時李生好客手自煎貴從活火發新泉又不

見今時潞公煎茶學西蜀定州花瓷琢紅玉我今貧病  
常苦饑分無杯盃捧蛾眉且學公家作茗飲磚爐石鈿  
行相隨不用撐腸拄腹文字五千卷但願一甌常及睡  
足日高時

送南屏謙師

蘇軾

道人曉出南屏山來試點茶三昧手忽驚午盞兔毛斑  
打作春甕鶯兒酒天台乳花世不見玉川風腋今安有  
先生有意續茶經會使老謙名不朽

魯直以詩餽雙井茶次韻為謝 蘇軾

江夏無雙種竒茗汝陰六一誇新書磨成不敢付僮僕  
自看雪湯生璣珠列仙之儒瘠不腴只有病渴同相如  
明年我欲東南去畫舫何妨宿太湖

雙井茶送子瞻

宋 黃庭堅

人間風月不到處天上玉堂森寶書想見東坡舊居士  
揮毫百斛瀉明珠我家江南摘雲腴落磴霏霏雪不如  
為公喚起黃州夢獨載扁舟向五湖

謝王烟之惠茶

黃庭堅

平生心賞建谿春一丘風味極可人香包解盡寶帶胯  
黑面碾出明窗塵家園鷹爪政嘔冷官焙龍文常食陳  
於公歲取壑源足勿遣沙谿來亂真

簡江子之求茶

宋  
晁冲之

政和密雲不作團小夸寸許蒼龍蟠金花絳囊如截玉  
綠面彷彿松谿寒人間此品那可得三年間有終未識  
老夫於此百不忙飽食但苦夏日長北窗無風睡不解

齒頰苦澀思清涼故人新除協律郎交遊多在白玉堂  
揀牙鬪夸皆飫嘗幸為傳聲李太府煩渠折簡買頭綱  
謝木韞之舍人分送講筵賜茶

宋 楊萬里

吳綾縫囊染菊水蠻砂塗印題進字淳熙錫貢新水芽  
天珍誤落黃茅地故人鸞渚紫薇郎金華講徹花草香  
宣賜龍焙第一綱殿上走趨明月璫御前啜罷三危露  
滿袖香煙懷璧去歸來拈出兩蛭雷鳴晦冥驚破柱

北苑龍芽內樣新銅圍銀範鑄瓊塵九天寶月霏五雲  
玉龍雙舞黃金鱗老夫平生愛煮茗十年燒穿折脚鼎  
下山汲井得甘冷上山摘芽得苦梗何曾夢到龍遊窠  
何曾夢吃龍芽茶故人分送玉川子春風來自玉皇家  
鍛圭椎壁調冰水烹龍魚鳳搜肝髓石花紫笋可衙官  
赤印白泥牛走爾故人氣味茶樣清故人丰骨茶樣明  
開緘不但似見面叩之咳唾金石聲麴生勸人墮巾幘  
睡魔勸我拋書冊老夫七椀病未能一啜猶堪坐秋夕

和曾逢原試茶連韻

宋 僧惠洪

霜須瘴面豁齒牙門前小舟嘗自拏  
茅茨叢竹依壠畬君來遊時方採茶  
傳呼部曲江路賒迎門顛倒披袈裟  
仙風照人虔敬加秀如春露濕蘭芽  
和如東風吹竒葩馬蹄歸路衝飛花  
青松轉壑登龍蛇路人聚觀不敢譁  
詩筒復肯來山家想見戟門兵衛遮  
湘江玉展無纖瑕但聞江空響釣車  
嗟予生計唯捩輟安識醉墨翻側麻  
喜如小兒抱秋瓜宣和官焙囊絳紗  
見之美如癢初爬



愛客自試歡無涯身世都忘是長沙院落日長蜂趨衙  
園林雨足鳴池蛙詩成句法規正邪細窺不容銖兩差  
逸羣翰墨爭傳誇坡谷非子前身耶沅湘萬古一長嗟  
明年夜直趨東華應有佳句懷煙霞

煮土茶歌

元  
洪希文

論茶自古稱壑源品水無出中濡泉莆中苦茶出土產  
鄉味自汲井水煎器新火活清味永且從平地休登仙  
王侯第宅鬪絕品揣分不到山翁前臨風一啜心自省

此意莫與他人傳

白雲泉煮茶

明 韓奕

白雲在天不作雨石罇出泉如五乳追尋能自遠師來  
題詠初因白公語山中知味有高禪採得新芽社雨前  
欲試點茶三昧手上山親汲雲間泉物品由來貴同性  
骨清肉膩味方永客來如解喫茶去何但令人塵夢醒

采茶詞

明 高啟

雷過谿山碧雲暖幽叢半吐槍旗短銀釵女兒相應歌

筐中摘得誰最多歸來清香猶在手高品先將呈太守  
竹爐新焙未得嘗籠盛販與湖南商山家不解種未黍  
衣食年年在春雨

五言律

送陸鴻漸棲霞寺採茶

唐  
皇甫冉

採茶非採茶遠遠上層崖布葉春風暖盈筐白日斜  
舊知山寺路時宿野人家借問王孫草何時況椀花

津梁寺採新茶與幕中諸公遍賞芳香尤異因

題四韻兼呈陸郎中

唐  
武元衡

靈卉碧巖下，萸英初散芳。  
塗塗猶宿露，采采不盈筐。  
陰竇藏煙濕，單衣染焙香。  
幸將調鼎味，一為奏明光。

穎公遺碧霄峯茗

宋  
梅堯臣

到山春已晚，何處有新茶。  
峯頂應多雨，天寒始發芽。  
採時林狖靜，蒸處石泉嘉。  
持作衣囊秘，分來五柳家。

怡然以垂雲新茶見餉，報以大龍團仍戲作小

詩

宋  
蘇軾

妙供來香積珍烹具大官揀牙分雀舌賜茗出龍團曉  
日雲菴暖春風浴殿寒聊將試道眼莫作兩般看

綠窗詩

元孫淑

小閣烹香茗疎簾下玉鈎燈光翻出鼎釵影倒沈甌婢  
捧消春困親嘗散莫愁吟詩因坐久月轉晚妝樓

雨後過雲公問茶事

明居節

雨洗千山出氤氳綠滿空開門飛燕子吹面落花風野  
色行人外經聲流水中因來問茶事不覺過雲東

五言排律

五言月夜啜茶聯句

唐顏真卿

汎花邀坐客代飲引清言

陸士修

醒酒宜華席留僧想獨園

張薦

不須攀月桂何暇樹庭萱

李

御史秋風勁尚書北斗

尊崔流華淨肌骨疏淪滌心源

真卿

不似春醪醉何辭綠

菽繁

鮫然

素瓷傳靜夜芳氣滿閒軒

士修

題茶山

唐杜牧

山實東吳秀茶稱瑞草魁剖符雖俗吏修貢亦仙才  
谿

盡停蠻棹旗張卓翠苔柳邨穿窈窕松澗渡喧豨等級  
雲峯峻寬平洞府開拂天聞笑語特地見樓臺泉嫩黃  
金湧牙香紫壁裁拜章期沃日輕騎疾奔雷舞袖嵐侵  
潤歌聲谷答迴磬音藏葉鳥雪豔照潭梅好是全家到  
兼為奉詔來樹陰香作帳花徑落成堆景物殘三月登  
臨愴一杯重遊難自尅俛首入塵埃

蜀州鄭史君寄烏觜茶因以贈答八韻

唐  
薛能

烏背擷渾牙精靈勝鑊鄒烹嘗方帶酒滋味更無茶拒  
碾乾聲細撐封利穎斜銜蘆齊勁實啄木聚菁華鹽損  
添常誠薑宜著更誇得來拋道藥攜去就僧家旋覺前  
甌淺還愁後信賒千慙故人意此惠敵丹砂

故人寄茶

唐曹鄴

劍外九華英緘題下玉京開時微月上碾處亂泉聲半  
夜招僧至孤吟對月烹碧沈霞脚碎香汎乳花輕六腑  
睡神去數朝詩思清月餘不敢費留伴肘書行



茶園十二韻

宋 王禹偁

勤王修歲貢晚駕過郊原蔽芾餘千本青蔥共一園牙  
新撐老葉土軟迸新根舌小伴黃雀毛獐摘綠猿出蒸  
香便別入焙火微溫採近桐華節生無穀雨痕緘滕防  
遠道進獻趨頭番待破華胥夢先經閭闔門汲泉鳴玉  
甃開宴壓瑤罇茂育知天意甄收荷主恩沃心同直諫  
苦口類嘉言未復金鑿召年年奉至尊

和門下殷侍郎新茶二十韻

宋 徐鉉

暖吹入春園新芽競粲然才教鷹嘴坼未放雪花妍荷  
杖青林下攜筐旭景前孕靈資雨露鍾秀自山川碾後  
香彌遠烹來色更鮮名隨土地貴味逐水泉遷力藉流  
黃暖形模紫筍圓正當鑽柳火遙想湧金泉任道時新  
物須依古法煎輕甌浮綠乳孤竈散餘煙甘齋非予匹  
宮槐讓我先竹孤空冉冉荷弱謾田田解渴消殘酒清  
神感夜眠十漿何足饋百榼盡堪捐采擷唯憂晚營求  
不計錢任公因焙顯陸氏有經傳愛甚真成癖嘗多合

得仙亭臺虛靜處風月豔陽天自可臨泉石何妨雜管  
絃東山似蒙頂願得從諸賢

七言律

謝李六郎寄新蜀茶

唐白居易

故情周匝向交親新茗分張及病身紅紙一封書後信  
綠芽十片火前春湯添勺水煎魚眼末下刀圭攪麩塵  
不寄他人先寄我應緣我自別茶人

謝劉相公寄天柱茶

唐薛能

兩串春團敵夜光名題天柱印維揚偷嬾曼倩桃無味  
搗覺嫦娥藥不香惜恐被分緣利市盡應難覓為供堂  
麤官寄與真拋却賴有詩情合得嘗

峽中嘗茶

唐  
鄭谷

簇簇新英摘露光小江園裏火前嘗吳僧謾說鴉山好  
蜀叟休誇烏嘴香入座半甌輕汎綠開緘數片淺含黃  
鹿門閒客不歸去酒渴更知春味長

尚書惠蠟面茶

唐  
徐夔

武夷春暖月初圓採摘新芽獻地仙飛鵲印成香蠟片  
啼猿谿走木蘭船金槽和碾沈香末冰椀輕涵翠縷煙  
分贈恩深知最異晚鐫宜煮北山泉

東亭茶讌

唐鮑君微

閒朝向曉出簾櫳茗讌東亭四望通遠眺城池山色裏  
俯聆絃管水聲中幽篁暎沼新抽翠芳槿低簷欲吐紅  
坐久此中無限興更憐團扇起清風

龍鳳茶

宋王禹偁

樣標龍鳳號題新賜得還因作近臣烹處豈期商嶺水  
碾時空想建谿春香於九畹芳蘭氣圓似三秋皓月輪  
愛惜不嘗惟恐盡除將供養白頭親

次謝許少卿寄卧龍山茶

宋趙抃

越芽遠寄入都時酬倡珍誇互見詩紫玉叢中觀雨脚  
翠峯頂上摘雲旗啜多思爽都忘寐吟苦更長了不知  
想到明年公進用卧龍春色自遲遲

嘗茶次寄越僧靈皎

宋林逋

白雲峯下兩槍新膩綠  
長鮮穀雨春靜試却如湖上雪  
對嘗兼憶剡中人  
餅懸金粉師應有  
筋點瓊花我自珍  
清話幾時搔首後  
願和松色勸三巡

惠山謁錢道人烹小龍團登絕頂望太湖

宋蘇軾

踏遍江南南岸山  
逢山未免更留連  
獨攜天上小團月  
來試人間第二泉  
石路縈迴九龍脊  
水光翻動五湖天  
孫登無語空歸去  
半嶺松聲萬壑傳

次韻曹輔寄壑源試焙新茶

蘇軾

仙山靈雨濕行雲洗遍香肌粉未勻  
明月來投玉川子清風吹破武林春  
要知冰雪心腸好不是膏油首面新  
戲作小詩君莫笑從來佳茗似佳人

汲江煎茶

蘇軾

活水還須活火烹自臨釣石汲深清  
大瓢貯月歸春甕小杓分江入夜鐺  
雪乳已翻煎處脚松風忽作瀉時聲  
枯腸未易禁三盃卧聽山城長短更



戲酬嘗草茶

宋沈與求

慣看留客費瓜茶政羨多藏不示夸  
要使睡魔能偃草肯慙歡伯解迷花  
一旗但覺烹殊品雙鳳何須覓瑞芽  
待摘家山供茗飲與君盟約去驕奢

答卓民表送茶

宋朱松

攬雲飛雪一番新誰念幽人尚食陳  
髣髴三生玉川子破除千餅建谿春  
喚回窈窕清都夢洗盡蓬蓬渴肺塵  
便欲乘風度芹水却悲狡獪得君嗔

胡邦衡生日以詩送北苑八銜日注二餅

宋周必大

賀客稱觴滿冠霞懸知酒渴正思茶尚書八餅分閩焙  
主簿雙餅揀越芽妙手合調金鼎鉉清風穩到玉皇家  
明年勅使宣臺餽莫忘幽人賦葉嘉

次韻王少府送蕉坑茶

周必大

昏然午枕困漳濱醒以清風賴子真初似參禪逢硬語  
久如味諫得端人王程不趣清明宴野老先分浩蕩春

敢向柘羅評綠玉待君同碾試飛塵

以六一泉煮雙井茶

宋 楊萬里

鷹爪新茶蟹眼湯松風鳴雪兔毫霜細叅六一泉中味  
故有涪翁句子香日鑄建谿當退舍落霞秋水夢還鄉  
何時歸上滕王閣自看風爐自煮嘗

陳蹇叔郎中出閩漕別送新茶李聖俞郎中出  
手分似

楊萬里

頭網別樣建谿春小壁蒼龍浪得名細瀉谷簾珠顆露

打成寒食杏花餠  
鷓斑椀面雲縈字  
兔褐甌心雪作泓  
不待清風生兩腋  
清風先向舌端生

次韻劉升卿惠焦坑寺茶用東坡韻

宋 王庭珪

日出城門啼早鴉  
杖藜投足野僧家  
非關西寺鐘前飯  
要看南枝雪裏花  
玉局偶然留妙語  
焦坑從此貴新茶  
劉郎寄我蕪長句  
落筆更如錐畫沙

與客啜茶戲成

宋 僧惠洪

道人要我煮溫山似識相如病裏顏金鼎浪翻螃蟹眼  
玉甌絞刷鷓鴣斑津津白乳衝眉上拂拂清風產腋間  
喚起晴窗春晝夢絕憐佳味少人攀

西域從王君玉乞茶因其韻

元 耶律楚材

積年不啜建谿茶心竅黃塵塞五車碧玉甌中思雪浪  
黃金碾畔憶雷芽盧仝七椀詩難得諗老三甌夢亦賒  
敢乞君侯分數餅暫教清興遶煙霞

其二

厚意江洪絕品茶先生分出蒲輪車雪花濫濫浮金蕊  
玉屑紛紛碎白芽破夢一杯非易得搜腸三椀不能賒  
瓊甌啜罷酬平昔飽看西山插翠霞

其三

高人惠我嶺南茶爛賞飛花雪沒車玉屑三甌烹嫩蘂  
青旗一葉碾新芽頓令衰叟詩魂爽便覺紅塵客夢賒  
兩腋清風生坐榻幽歡遠勝汎流霞

其四

酒仙飄逸不知茶可笑流涎見麴車玉杵和雲春素月  
金刀帶雨剪黃芽試將綺語求茶飲特勝春衫把酒賒  
吸罷神清淡無寐塵囂身世便雲霞

其五

長笑劉伶不識茶胡為買鍤謾隨車蕭蕭暮雨雲千頃  
礧礧春雷玉一芽建郡深甌吳地遠金山佳水楚江賒  
紅鑪石鼎烹團月一枕和香吸碧霞

其六

枯腸搜盡數杯茶，千卷胸中到幾車。  
湯響松風三昧手，雪香雷震一槍芽。  
滿囊垂賜情何厚，萬里攜來路更賒。  
清興無涯騰八表，騎鯨踏破赤城霞。

其七

啜罷江南一碗茶，枯腸歷歷走雷車。  
黃金小碾飛瓊屑，碧玉深甌點雪芽。  
筆陣陳兵詩思勇，睡魔卷甲夢魂賒。  
精神爽逸無餘事，卧看殘陽補斷霞。

嘗雲芝茶

元  
劉秉忠



鐵色皺皮帶老霜含英咀美入詩腸舌根未得天真味  
鼻觀先通聖妙香海上精華難品第江南草木屬尋常  
待將膚湊侵微汗毛骨生風六月涼

元統乙亥余除閩憲知事未行立春十日叅政

許可用惠茶寄詩以謝

元薩都拉

春到人間纔十日東風先過玉川家紫薇書寄斜封印  
黃閣香分上賜茶秋露有聲浮薤葉夜窗無夢到梅花  
清風兩腋歸何處直上三山看海霞

雪煎茶

元謝宗可

夜掃寒英煮綠塵松風入鼎更清新月團影落銀河水  
雲脚香融玉樹春陸井有泉應近俗陶江無酒未為貧  
詩脾奪盡豐年瑞分付蓬萊頂上人

煮茗軒

元謝應芳

聚蚊金谷任葷羶煮茗留人也自賢三百小團陽羨月  
尋常新汲惠山泉星飛白石童敲火煙出青林鶴上天  
午夢覺來湯欲沸松風初響竹爐邊

是夜酌泉試宜興吳大本所寄茶

明文徵明

醉思雪乳不能眠活火沙餅夜自煎白絹旋開陽羨月  
竹符新調惠山泉地爐殘雪貧陶穀破屋清風病玉川  
莫道年來塵滿腹小窗寒夢已醒然

某伯子惠虎丘茗謝之

明徐渭

虎丘春茗妙烘蒸七椀何愁不上升青箬舊封題穀雨  
紫砂新罐買宜興却從梅月橫三弄細攪松風炮一燈

合向吳儂彤管說好將書上玉壺冰

七言排律

和伯恭自造新茶

宋余靖

郡庭無事即仙家野圃栽成紫筍茶  
疎雨半晴回暖氣輕雷初過得新芽  
烘褫精謹松齋靜採擷縈迂澗路斜  
江水對煎萍鬢鬢越甌新試雪交加  
一槍試焙春尤早三盞搜腸句更嘉  
多謝彩箋貽雅贖想資詩筆思無涯

五言絕句

茶嶺

唐  
韋處厚

顧渚吳商絕  
蒙山蜀信稀  
千叢因此始  
含露紫茸肥

茶嶺

唐  
張籍

紫芽連白蘂  
初向嶺頭生  
自看家人摘  
尋常觸路行

山泉煎茶有懷

唐  
白居易

坐酌泠泠水  
看煎瑟瑟塵  
無由持一盃  
寄與愛茶人

七言絕句

與趙苕茶讌

唐  
錢起

竹下忘言對紫茶全勝羽客醉流霞塵心洗盡興難盡  
一樹蟬聲片影斜

新茶詠寄上西川相公二十三舅大夫二十舅

唐盧綸

三獻蓬萊始一嘗日調金鼎閱芳香貯之玉合才半餅  
寄與阿連題數行

嘗茶

唐劉禹錫

生拍芳茸鷹觜芽老郎封寄謫仙家今宵更有湘江月

照出霏霏滿盃花

蕭員外寄新蜀茶

唐白居易

蜀茶寄到但驚新  
渭水煎來始覺珍  
滿甌似乳堪持翫  
況是春深酒渴人

乞新茶

唐姚合

嫩綠微黃碧澗春  
採時聞道斷葷辛  
不將錢買將詩乞  
借問山翁有幾人

茗坡

唐陸希聲

二月山家穀雨天半坡  
芳茗露華鮮春醒酒病兼消渴  
惜取新芽旋摘煎

答友寄新茗

唐李羣玉

滿火芳香碾麴塵  
吳甌湘水綠花新  
愧君千里分滋味  
寄與春風酒渴人

煎茶

唐成彥雄

岳寺春深睡起時  
虎跑泉畔思遲遲  
蜀茶倩箇雲僧碾  
自拾枯松三四枝



與亢居士青山潭飲茶

唐僧靈一

野泉烟火白雲間坐飲香茶愛此山巖下維舟不忍去  
青溪流水暮潺潺

茶

宋林逋

石碾輕飛瑟瑟塵乳香烹出建谿春世間絕品人難識  
閒對茶經憶古人

遊諸佛舍一日飲釅茶七盞戲書勤師壁

宋蘇軾

示病維摩元不病在家靈運已忘家何須魏帝一九藥  
且盡盧仝七椀茶

謝公擇舅分賜茶

宋 黃庭堅

外家新賜蒼龍壁北焙風煙天上來明日蓬山破寒月  
先甘和夢聽春雷

奉同公擇作揀芽詠

黃庭堅

赤囊歲上雙龍壁曾見前朝盛事來想得天香隨御所  
延春閣道轉輕雷

初識茶花

宋 陳與義

伊軋藍輿不受催  
湖南秋色更佳哉  
青裙玉面初相識  
九月茶花滿路開

李茂嘉寄茶

宋 孫覲

蠻珍分到謫仙家  
斷壁殘璋裹絳紗  
擬把金釵候湯眼  
不將白玉伴脂麻

舟泊吳江

宋 楊萬里

江湖便是老生涯  
佳處何妨且泊家  
自汲淞江橋下水

垂虹亭上試新茶

賞茶

宋戴昺

自汲香泉帶落花漫燒石鼎試新茶綠陰天氣閒庭院  
卧聽黃蜂報晚衙

偶成

金吳激

蟹湯兔盞鬪旗槍風雨中枕簟涼學道窮年何所得  
只工掃地與焚香

夏至

金趙秉文

玉堂睡起苦思茶  
別院銅輪碾露芽  
紅日轉堦簾影薄  
一雙蝴蝶上葵花

題蘇東坡墨蹟

元虞集

老却眉山長帽翁  
茶煙輕颺鬢絲風  
錦囊舊賜龍團在  
誰為分泉落月中

竹窗

元馬臻

竹窗西日晚來明  
桂子香中鶴夢清  
侍立小童閒不動  
蕭蕭石鼎煮茶聲

過山家

明高啟

流水聲中響緯車板橋春暗樹無花風前何處香來近  
隔掩人家午焙茶

送翰林宋先生致政歸金華

明孫蕢

紅鞵金帶荔枝花三品詞林內相家歸去山中無個事  
瓦餅春水自煎茶

送茶僧

明陸容

江南風致說僧家石上清香竹裏茶法藏名僧知更好

香煙茶暈滿袈裟

贈歐道士賣茶

明施漸

靜守黃庭不煉丹，因貧却得一身閒。  
自看火候蒸茶熟，野鹿銜筐送下山。

題唐伯虎烹茶圖為喻正之太守

明王穉登

太守風流嗜酪奴，行春常帶煮茶圖。  
圖中傲吏依稀似，紗帽籠頭對竹爐。

其二

靈源洞口採旗槍五馬來乘穀雨嘗從此端明茶譜上  
又添新品綠雲香

其三

伏龍十里盡香風正近吾家別墅東他日干旄能見訪  
休將水厄笑王濛

暮春偶過山家

明 吳 兆

山邨處處採新茶一道春流繞幾家石徑行來微有跡



不知滿地是松花

題書經室

明  
僧德祥

池邊木筆花新吐  
窗外芭蕉葉未齊  
正是欲書三五偈  
煮茶香過竹林西

御定佩文齋詠物詩選卷二百四十四

欽定四庫全書

御定佩文齋詠物詩選卷二百四十五

飯類

五言古

蔬飯

宋  
朱松

蔽拳嬰兒手笋解穉龍蛻薦羞把菊間采斲煙雨外嗟  
予飯藜藿咽塞舟泝瀨朝來二美兼一飽良已泰充腸  
我誠足染指客應慨平生食肉相琴瑟何足賴王郎催

牛炙韓老憶鯨鱠俠氣信雄夸戲語亦狡獪我師魯顏  
子陋巷翳蓬艾執瓢不可從一取清泉酌

五言律

佐還山後寄

唐杜甫

白露黃梁熟分張素有期已應春得細頗覺寄來遲味  
豈同金菊香宜配綠葵老人他日愛正想滑流匙

七言律

潤卿遺青餽飯蕪之一絕聊用答謝

唐皮日休

傳得三元飢飯名，大宛聞說有仙卿。  
分泉過屋春青稻，拂露褫衣折紫莖。  
蒸處不教雙鶴見，服來唯怕五雲生。  
草堂空坐無饑色，時把金津漱一聲。

七言絕句

潤卿遺青飢飯

唐陸龜蒙

舊聞香積金僊食，今見青精玉斧餐。  
自笑鏡中無骨錄，可能飛上紫雲端。

以青飢飯分送襲美魯望因成一絕

唐張賁

誰屑瓊瑤事青飢舊傳名品出華陽應宜仙子胡麻拌

因送劉郎與阮郎

送喬全寄賀君

宋蘇軾

千古風流賀季真最憐嗜酒謫仙人狂吟醉舞知無益  
粟飯藜羹問養神

竹枝歌

宋楊萬里

岸傍燎火莫闌殘  
須念兒郎手脚寒  
更把綠荷包熟飯  
前頭不怕上高灘

武陵莊

明  
沈明臣

青精作飯紫萸羹  
飽後微吟水上行  
不道空山曾有寺  
隔谿風送午鐘聲

御定佩文齋詠物詩選卷二百四十五